

摘藻堂四庫全書薈要

集部

欽定四庫全書薈要卷二萬九十三

元文類卷十

元 蘇天爵 編

冊文

皇后冊文

王 磐

維至元十年歲次癸酉三月甲寅朔十三日丙寅皇帝
若曰天地合德故能覆載萬物而不遺日月並明所以
照臨六合而無外至哉夫婦之大義實配陰陽之兩儀

容爾皇后鴻吉哩氏戚里名家元勲貴族備儀率禮令
德來嬪自朕奉藩之初至于踐阼之日明識遠慮裨益
宏多雖禕翟正位于長秋而典冊未光于大禮茲者文
王敷奏實應朕心今遣攝太尉中書右丞相安圖持節
授爾玉冊寶章備物充庭式遵古典於戲恭順接下九
族形雍睦之風儉素相高萬世衍靈長之福服茲寵命
益懋徽猷

皇太子冊文

圖克坦公履

皇帝若曰咨爾皇太子珍戩仰惟太祖聖武皇帝遺訓
嫡子中有克嗣服繼統者預選定之是用立太宗英文
皇帝以紹隆丕構自時厥後不為顯立冢嫡遂啓爭端
朕上守祖宗宏遠之規下協昆弟僉同之議乃從燕邸立爾
為皇太子積有日矣比者儒臣敷奏國家定立儲嗣宜
有冊命此典禮也今遣攝太尉中書左丞相巴延持節
授爾玉冊金寶於戲聖武燕謀爾其奉承昆弟宗親爾
其和協使仁孝顯於躬行可謂不負所託矣尚其戒哉

式勿替朕命

太祖皇帝加上尊號冊文

王 構

維至大二年歲次己酉某月某日孝曾孫嗣皇帝臣某
謹再拜稽首言伏以恢皇綱廓帝紘建萬世無疆之業
鋪宏休揚偉績遵累朝已定之規式當繼統之元蓋有
稱天之誅孝弗忘於率履制庸謹於加崇欽惟太祖聖
武皇帝陛下淵量聖姿睿謀雄斷沛仁恩而濟屯厄振
羈策以馭豪英惟解衣推食于初年見君國子民之大

畧玄符顯握諸部悉平黃鉞載麾百城隨下裔土兼收
于夏孽餘波竟殄于金源蕩蕩乎無能名迹遠追于湯
武灝灝爾其爲訓道允協于唐虞根深峻嶽而維者四
馬囊括殊封而統之一也肆予小子承此丕基兩祇見
於太宮恒僊臨于端宸祚垂鴻兮錫裕尚期昭報之申
牒鏤玉以增輝敢綴彌文之舉謹遣某官某奉玉冊玉
寶加上尊謚曰法天啓運聖武皇帝廟號太祖伏惟威
靈昭格景貺潛臻闡繹吾元與天並久

世祖皇帝謚冊文

王構

維至元三十一年歲次甲午五月庚戌朔越九日戊午
孝孫嗣皇帝臣某再拜稽首言臣聞繼志述事非盡孝
無以盡其誠表行誅功非定謚無以稱其實肆邦彛之
具舉維天道之協從欽惟先皇帝膺籙受圖體元立統
蚤從藩邸茂著徽稱為治之基有常經國之畧則遠役
用衆智獨斷于衷總攬萬機如指諸掌內朝廷外侯牧
等威迭降罔不適中先教化後刑名本末相循亦皆有

序在御迨踰于三紀推尊合冠於百王若夫惠及困窮
恩加降附慎終如始每存好生之心保小以仁特示包
荒之量擴盛猷之鴻邕沛膏澤之醇醲方其泰運漸亨
戢寧多難離綱復綴混一四方傳檄而氛祲開渙號而
方維定乾旋坤轉不足以喻其機雷厲風飛不足以比
其捷至於嘉言博採惟典謨訓誥是師諸藝畢延盡陰
陽圖緯之學考音律以創字畫參古今以制禮儀振耀
威靈肅陳兵衛白旄黃鉞持則親巡犀甲雕弧止于不

用其聖德勿可及已神功蔑以尚焉蓋文之所加者深
武之所服者大是用升崇吉祔揆卜剛辰謹遣攝太尉
臣鄂都岱奉冊寶上尊諡曰聖德神功文武皇帝廟號
世祖伏惟睿靈俯垂昭鑒思皇多祐錫美無疆

皇太后冊文

陳儼

維至元三十一年歲在甲午十一月丁未朔皇帝臣某
謹稽首再拜言曰臣聞自家而國治道必有所先立愛
惟親君德莫加于孝况恩深于鞠我而禮重於正名歷

代以來令儀可考人子之職所在天下之母宜尊恭惟
聖母聖善本乎天資靜專法乎地道上以奉宗祏之重
下以叙倫紀之常助我前人守卷耳憂勤之志保予冲
子成思齊雖肅之風肆神器之有歸知孫謀之數定畀
付雖由于厯數規模一出于庭闈是用率籲衆心彰明
鉅慶不勝拳拳大願謹奉冊寶上尊稱曰皇太后伏惟
長信穆穆周宗綿綿備洛書之錫福絜慈極之儀天瑤
圖寶運於萬斯年誠歡誠忭稽首再拜

睿宗皇帝加上謚冊文

劉 賡

伏以詣泰壇而請命有稱天以誅之文薦清廟而致嚴
蓋在昔相承之典剛辰爰卜遺美載揚欽惟睿宗景襄
皇帝孝友溫恭聰明濬哲屬我家肇造于朔土佐聖祖
邁征于四方逮天討之奉行致皇威之遠暢金源假兩
河之息天水渝通好之盟遂移秦隴之師爰有褒斜之
舉既平南鄭順流而東再涉襄江自上而下乃眷三峯
之捷實開萬世之基唇既亡而齒亦寒號可伐而虞不

臘適英文之違豫圖中夏之底寧母作神羞請以身代
爰自金滕之啓已知寶祚之歸迪我後人紹茲明命徽
稱顯號雖已擬諸形容玉檢金泥尚未遑於潤色奉玉
冊玉寶加上尊諡曰仁聖景襄皇帝廟號睿宗伏惟端
臨宸座誕受鴻名億萬斯年永錫繁祉

順宗皇帝諡冊文

程鉅夫

孝子嗣皇帝臣某謹再拜稽首言曰臣聞顯親所以為
子追遠所以厚民矧必百世祀而位弗隆為天子父而

養弗逮是宜稱秩以達純誠欽惟皇考皇帝淵穆有容
神明莫測文孫文子鍾至愛于兩宮宜君宜王膺具瞻
於四海當璧之祥未卜棄蹤之跡已遙興言欲報之恩
昊天罔極對越有成之命夙夜惟寅昭哉玄德之升聖
矣生知之異衍莫衍于昌後嗣而有天下孝莫孝于配
前烈而茂本支念茲繼體之初益切中心之慕謹遣攝
太尉某官某奉玉冊玉寶上尊諡曰昭聖衍孝皇帝廟號
順宗伏惟明明降鑒序于祖宗攸躋攸寧永錫祚胤

皇后冊文

程鉅夫

惟皇慶二年歲次癸丑三月辛卯朔越十有六日丙午
皇帝若曰朕荷天地祖宗之祐皇太后之訓嗣大厯服
思底于治必立元配表正六宮咨爾鴻吉哩氏實我家
世戚嫡嗣所自出積德流慶肆啓爾來嬪於朕淑慎孝
恭令譽昭聞承命慈闈爰正爾位今遣攝太尉中書右
丞相圖古勒授爾玉冊玉寶命爾為皇后惟天地定位
萬物以生日月並照萬國以明君后合德萬化以成上

以事上帝奉宗廟下以親九族正萬邦為朕內助惟爾之賢其永念厥德履中體順俾聖母暨予一人以寧豈惟爾嘉天亦永相念爾共享有國欽哉

皇帝尊號玉冊文

姚燧

維至大二年正月乙酉朔越七日辛卯皇太子中書令樞密使臣某謹率中外文武百僚頓首頓首謹言昔我世祖既平炎趙質之於書幅員廣長振古無倫覆燾之下八紘萬國莫敢不庭何獨一王西北岸然憑道阻修

方命正朔德綏之而不摯威董之而不警夫豈不能聲
罪致罰深入其地終以聖人親其宗親包荒有年成宗
繼緒憤久驚頑天鑒昭明於裕皇孫獨異陛下授以太
祖皇帝信寶撫軍漠北是固以張足付神器之本時未
及冠承命即行其視萬里莽閭寒冽之鄉不遠不難如
堂適庭至則獎厲諸軍修明法志簡拔果毅均苦分勞
解衣燠寒推食飫飢洸洸汔汔士氣日作睿算伐謀待
寇歲至奪人以先身踐戎行霆馳電擊大北其羣虛已

不矜日慎一日始終十年不徂屢勝狂狡不懲悉銳來
加當以選鋒伺間出奇盡襲輜重彷彿無歸度不能軍
耄倪累累降口百萬致茲救寧平四十年未靖之梗成
兩祖宗未究之志天下之人聞其風聲思覩天光者顯
顯翹翹九圍一心握是乾符歸正宸極弛武事之夙習
洽新化以文治立愛自親曾未浹旬上尊太后問安以
時下建儲宮庶政是先又舉列聖未遑之典欽崇元祀
玉璫黃流薦裸太室還蹕龍興徘徊太祖龍旂九旂薈

金于斯肇基帝業為城中都又以孔子垂範百王將二
十年而顯謚未稱加大成於至聖文宣王上立勞于軍
與凡庭臣悉大賚之間歲不登既賑既恤虞施未博民
罹罪罟再肆大宥至德難名赫赫巍巍惟天為大掛一
漏萬井觀如斯求可盡臣下歸美報上者惟是徽稱謹
奉玉冊玉寶上尊號曰統天繼聖欽文英武大章孝皇
帝欽惟陛下立心天地立極生民茂對鴻名于億萬年

皇太后尊號玉冊文

姚燧

維至大三年歲次庚戌冬十月甲辰朔越五日戊申嗣

皇帝臣某臣伏思顯考順宗未臨海寓眇眇小子託其遺體顧踐丕基惟事聖母養以天下何無不有何欲不臻而隆名盛典辭未見俞非臣所以表微忱酬大德也欽惟皇太后陛下貞順而齊肅淵哲而剛明居常處變愛威異施臣在先朝受詔漠北往撫諸軍可謂遠役以義割恩愆愆其行迨輒河陽永懷彌切親至五臺禱于佛乘尚憑陰騭早遂振旅殿閣是崇霸貺用昭旋聞國

恤併日馳赴邪謀方興授冊儲皇曾不再日掃清宮掖
待臣以來畀付神器自非睿斷安救內訌往歲鸞輅再
輒五臺淨供大修以畢夙願極心為臣天燾地持日居
月諸其大其明非言所喻詩之言曰母氏劬勞推之眇
末咻仁煦慈百倍為艱圖以報塞惟崇顯號者強而名
之庶幾聖德昭明天下是用類于上帝禋于太室奉玉
冊玉寶上尊號曰儀天興聖慈仁昭懿壽元皇太后欽
惟皇太后陛下慶躋莫上之尊福衍無疆之厯菲躬是

保慈訓是承

皇太子冊文

閻 復

皇帝若曰祖宗聖緒恭承丕顯之謨兄弟懿親宜正元
之號立天下之大本示天下以至公咨爾太子阿裕爾巴墨特喇
德器淵深英姿玉粹武奮清宮之緯績文參定策之殊
勲豈特華萼交輝之情式相好矣其在鳬鷖守成之治
須汝贊之故于連枝同氣之間付以監國撫軍之任茲
上承子母意蓋允出于朕心已於六月朔旦面授爾

皇太子金寶今復遣攝太尉丞相塔斯巴哈持節授爾
玉冊維寵命之薦膺尚謙恭而自牧益盡寧親之孝益
勤事上之忠以敦九族內睦之風以衍億祀無疆之慶

成宗皇帝諡冊文

張士觀

嗣皇帝臣某謹再拜稽首言曰臣聞稱天以誅表名實
之至公法日而名庶形容之可擬維帝王之有諡蓋今
古之彛章欽惟大行皇帝稟上聖之資撫重熙之運當
裕考龍升之後承世皇燕翼之謀武威肅鎮於遐荒文

德誕敷于華夏業業謹盈成之戒愉愉盡孝敬之誠罷
勤遠之兵邊釁弭而苗頑格遣直指之使皇澤宣而民
瘼除九族形敦睦之風萬國裕隆平之治爰酌奉常之
議用昭告祔之文謹遣攝太尉某官某奉冊寶上尊諡
曰欽文廣孝皇帝廟號成宗伏惟睿靈在天孚鑒逮下
茂膺典冊錫羨邦家

仁宗皇帝諡冊文

張士觀

維延祐七年歲次庚申八月丁未朔粵十日丙辰孝子

嗣皇帝臣某謹再拜稽首言臣聞觀其諡而知其行著
王者之不稱禋于廟而誅於郊實邦家之彝典雖天地
之大莫能擬議而臣子之情宜極形容爰體至公式揚
景鑠欽惟大行皇帝聰明冠古勇智自天初大德之陟
遐生內覺於不測乃從潛邸獨運聖謨正神器于幾危
定乾維而重構豐功盛烈奮立一時偉望英聲揚溢四
海尋被武皇之歷試納于大麓以弗迷由母弟之懿親
膺元良之重寄取法裕廟主鬯之道隆奉養東朝因心

之孝至及嗣歷服益見猷為月恒日升廓昭代文明之

治海涵春煦推聖人博愛之仁至於敦勸農桑不嗜田

獵每覆奏於庶獄必惻怛于宸衷肇設制科以待天下

之士特旌死節以勵天下之忠臨御十年始終一德身

衛斯文而不倦人由其道而莫知克謹持盈諒多遺美

屬升崇于吉祔用祇薦于鴻名上以慰在天之靈下以

協造庭之請是諏剛日備舉縉儀謹遣攝太尉某官某

奉玉冊玉寶上尊諡曰聖文欽孝皇帝廟號仁宗伏冀

睿靈俯聖歆鑒流光有永錫羨無疆

英宗皇帝諡冊文

袁 楠

伏以瑤圖續緒神已御於鼎湖玉冊揚休禮宜陞於太
室悼降年之不永儼立政以如新爰述徽猷以傳信史
欽惟大行皇帝文明天縱剛健日嚴辨奸邪於嗣位之
初彤庭祇畏廣儀注于熙朝之際清廟肅雝絕封勅以
杜憊人申憲章以勵多士罰茲無赦令必惟行君臨三
載而有成知周萬物而莫隱豈運逢艱否大命靡終然

號謹追崇尊名是著謹遣攝太尉某官某奉玉冊玉寶
上尊謚曰睿聖文孝皇帝廟號英宗伏惟炳靈有赫歆
格無違祔于新宮以妥以宜

皇后冊文

素 楸

皇帝若曰在昔正始之道必先內治予以奉承宗祧化
成天下朕嗣天歷服祇循憲章宜資配助用彰位號咨
爾皇后鴻吉哩氏淑慎柔嘉遵道是行輔佐玉邸謙抑
自持實生元子國本斯建興龍重鎮介子紹封粵若臨

御之初贊畫計慮厥相惟多正位中宮天人協祥今遣
攝太尉中書右丞相舒瑪爾節授爾玉冊寶章坤順承天
人道攸則表正母儀萬邦是觀維躬儉節用則徽音是
嗣惟求賢審官則私謁靡干匡朕德格朕心實為有賴
詩書所稱罔專美於前代噫敬厥初終有慶尚其念哉
以膺爾景命

明宗皇帝諡冊文

虞集

臣聞統必有宗生嘗得以致其讓廟必有主歿思所以

尊其名稽古考文宜天錫誅欽惟先皇帝夙秉勇智惟
時元良體傳次之成言避謳歌而迭出雖身居絕域多
歷于歲年而義動遠人樂為之先後德威孔著未堪大
業之艱貞事變匪常猶閔生靈而慎動庶來蘇於後戴
爰戡定以奉迎已謹清宮俄虛黃屋臣民寡祐永遺惠
政之敷施天日有靈尚想神明之如在禮嚴升祔誠備
顯揚謹遣太尉某官某奉玉冊玉寶上尊謚曰翼獻
景孝皇帝廟號明宗伏冀睿慈俯回歆假克綏丕祚垂

裕無疆

元文類卷十

欽定四庫全書薈要卷二萬九十四

元文類卷十一

元 蘇天爵 編

制

加封孔子制

大德十一年九月

閻 復

蓋聞先孔子而聖者非孔子無以明後孔子而聖者非孔子無以法所謂祖述堯舜憲章文武儀範百王師表萬世者也朕纂承丕緒敬仰休風循治古之良規舉追

封之盛典加號大成至聖文宣王遣使闕里祀以太牢
於戲父子之親君臣之義永惟聖教之尊天地之大日
月之明奚罄明言之教尚資神化祚我皇元

加封孔子父母制

至順元年

謝 端

闕里有家系出神明之胄尼山請禱天啟聖人之生朕
聿觀人文敦求往哲惟孔氏之有作集羣聖之大成原
道統則堯授舜傳之周文王論世家則契至湯下逮正
考甫其明德也遠矣故生知者出焉有開必先克昌厥

後如太極之生天地如鉅海之有本源雲仍既襲于上
公之封考妣宜視夫素王之爵於戲君子之道考而不
繆建而不悖予以敦典而叙倫宗廟之禮愛其所親敬其
所尊予以報功而崇德尚篤其慶以相斯文齊國公叔
梁紇可加封啟聖王魯國太夫人顏氏可封啟聖王夫
人

封宣聖夫人制

虞集

我國家惇典禮以彌文本閨門以成教廼瞻素王之廟

尚虛元嬀之封有其舉之斯為盛矣大成至聖文宣王
妻元官氏來嬪聖室垂裕世家籙豆出房因流風于殷
禮琴瑟在御存燕樂于魯堂功言邈若于遺聞儀範儼
乎其合德作爾禕衣之象稱其命鼎之銘噫秩秩彝倫
吾欲廣闕睢雀巢之化皇皇文治天其興河圖鳳鳥之
祥可特封大成至聖文宣王夫人

追封孟子父母制

延祐三年十月

張士觀

朕惟繇孔子至于孟子百有餘歲而道統之傳獨得其

正雖命世亞聖之才亦資父母教養之力也其父夙喪
母以三遷之教勵天下後世推原所自功莫大焉稽諸
往代實闕褒崇夫功大而位不酬實著而名不正豈朕
所以致懷賢之意哉肆頒寵命永賁神休可追封其父
為邾國公母為邾國宣獻夫人

追封伯夷叔齊制

閻復

蓋聞古者伯夷叔齊逃孤竹之封甘首陽之餓讓爵以
明長幼之序諫伐以嚴君臣之分可謂行義以達道殺

身以成仁者也昔居北海之濱遺廟東山之上休光垂
乎千載餘澤被于一方永懷孤峻之風庸示褒崇之典
於戲去宗國而辭周粟曾是列爵之可廢揚義烈以激
清塵期于世教之有補可追封伯夷為昭義清惠公叔
齊為崇讓仁惠公

封周子為道國公制

霍希賢

蓋聞孟軻既沒道失其傳孔子微言人自為說諒斯文
其未喪有真儒之間生濂溪周惇頤稟元氣之至精紹

絕學于獨得圖太極而妙斡萬化著通書而同歸一誠
俾聖教燦然復明其休功尚其不泯朕守成繼體貴德
尊賢追念前修久稽彝典已從廟庭之祀盍疏鄉國之
封於戲霽月光風想清規之如在玄衮赤紱冀寵命之
斯承

楊庸教授三氏子孫制

中統元年九月

楊果

孔氏顏孟之家皆聖賢之後也自兵亂以來徃徃失學
甘為庸鄙朕甚憫焉今以進士楊庸教授孔氏顏孟子

弟務要嚴加訓誨精通經術以繼聖賢之業

許衡為懷孟教官制

楊果

咨爾許衡天資雅厚經學精專大凡講論之間深得聖賢之奧受罰者恐陳君所短為盜者畏王烈之知所在向風真堪正俗可令于懷孟等處選揀子弟俊秀者舉歸教育取作範模再令董子帷前有傳授之弟子重使王通門下皆經濟之名臣毋喪斯文以弼予治

降封宋主為瀛國公制

王磐

時逢屯否嶽瀆分疆運值休明乾坤一統眷靖康之餘
裔擅吳會之奧區遠隔華夏久睽鄰好我國家誕膺景
命奄有多方炎風朔雪之鄉盡修職貢若木虞淵之地
靡不來庭歷六合而混同豈一方之獨異用慰徯蘇之
望爰興問罪之師戈船飛渡而天塹無憑鐵馬長驅而
松關失險宋主顯乃能察人心之向背識天道之推移
正大姦誤國之誅斥羣小浮海之議決謀宮禁送款軍
門奉章奏以祈哀率親族而入覲是用招示大信度越

彛章位諸台輔之尊爵以上公之貴可封開府儀同三司檢校司徒瀛國公

丞相史天澤贈諡制

劉元

周制以八統詔王必先敬故漢官以列爵馭下亦自報功古有彛章朕茲申勸故開府儀同三司平章軍國重事中書左丞相史天澤性資貞亮器宇沉雄自開國以將三軍妙契淮陰之畧至分茅而推千乘甚高孤竹之風况結知于累朝追總戎于四紀及朕纂承之始克膺

輔相之良內秉國均兼筦機于右府外清邊陲幾授鉞
于齋壇可謂威惠之交孚抑亦忠勤之備至繼以荆蠻
之蠹重煩汴省之趨惟時壯猷行策功而飲至不圖晚
志遽引年以謝歸申言齒德之尊端念典刑之益命開
府第協贊廟謀方就佚于尊壘復遺憂于邊閭冀資偉
筭用一遐瓊顧上游之濟師方倚坐籌之勝愴中途之
病革莫收卧護之勲弗飾厥終曷旌廼績宜表出羣之
行登符六泰之階於戲國步方新天不憖遺于一老閔章

加祿卿其永賁于九原營魂有知歆予異渥可贈開府儀同三司太尉尉諡忠武公

太保劉秉忠贈諡制

李槃

臣以忠孝而事上貴輸獻納之誠上以禮義而遇臣思篤始終之愛視死之日猶生之年故光祿大夫太保參領中書省事劉秉忠學窺天人識貫古今遂冲而有守安靜而無華昔侍潛藩稔聞高論適當三接之際懇上萬言之書益將舉天下而措諸安以戒為人主者果于

毅朕嗣服而伊始卿盡力以居多蓋得卿實契于朕心
而獨朕悉知于卿意事皆有驗人匪他求周旋三十年
不避其難剴切數百奏各中其理共成庶政方圖任于
舊人誰謂昊天不憖遺于一老興言及此何日忘之再
惟台輔之尊厥有泉局之責是用錫之綸命峻一品之
華階祿以哀衣躡三槐之正位復加顯號允答殊勲惟
爾英靈識予哀寵可贈開府儀同三司太傅謚文貞公

左丞董文炳贈謚制

李槃

折衝禦侮誠社稷之良臣崇德報功實國家之令典途

雖殊于生死禮當極于哀榮故資善大夫中書左丞僉書

樞密院事董文炳王佐之才將家之子自出宰于劇縣

嘗入侍于潛藩山路間闕謁戒輅遠趨于六詔風濤洶

湧危龍舟首渡于三江迨予嗣服之年委以專征之任

截彼淮浦至于海邦招降兩浙之新民撫定七閩之故

地大小數百戰奮不顧身勤勞三十年厥有成績往者

睢揚城下父已歿于兵鋒北來揚子橋邊男復終于王

事一門忠孝萬古芳香及茲幹事而回方以不次而待
何言中路殲我良人蓋非卿孰佐于朕躬而獨朕悉知
于卿意弗頒異數曷慰永懷其陞一品之榮以賁九泉
之陞倘其有識歆此無窮可贈金紫光祿大夫平章政
事謚忠獻公

丞相巴延贈謚制

閻復

天下大統不嗜殺則一之聖主弘功蓋必資于賢者昔
在至元之際方隆混一之期有來命世之奇材懋建殊

常之偉績故太傅開府儀同三司錄軍國重事已延崆
峒孕秀列象騰精居政府則不動聲氣措泰山之安秉
戎律則純乎仁義猶時雨之降當其聲鶴浦渝盟之罪
總龍驤飛渡之師克廣世祖好生之心允獲宋人誠服
之意衣冠不改市肆不易恩威普洽于三吳車書以混
文軌以同聲教遂覃于百粵逮朕纂承之始益申推戴
之誠永懷社稷之宗臣宜侈河山之高爵於戲曹侍中
江南之役規摹一何小哉郭汾陽異姓而王崇報斯亦

至矣可贈宣忠佐命開濟功臣太師開府儀同三司追封淮安王謚忠武

丞相阿珠贈謚制

閻復

邊外開邊四達弗庭之域將門出將三持分閭之權緬思百戰之勞宜用九原之賁故光祿大夫中書左丞相兼都元帥贈開府儀同三司太尉追封并國公謚武宣阿珠英才間世勇畧邁倫當先皇大理之征佐廼父雲南之役靖蠻荒而平交趾拔襄漢而下江南爲瘴揮戈

萬里若社席之上龍驤飛渡三吳歸掌握之中贊成混
一之圖式副元勲之號按禮寺易名之典加王章異等
之恩於戲青史屢書諒騰芳之有永黃河如帶尚流慶
于無窮可加贈推誠宣力保大功臣太尉開府儀同三
司上柱國追封河南郡王謚武定

丞相錫津贈謚制

閻復

蕭曹翊漢素非閑閱之家房杜匡唐卒乏鈞衡之嗣眷
先朝之碩輔綿累世之芳猷永懷弼亮之賢庸示褒崇

之禮太傳錄軍國重事開府儀同三司中書右丞相監
修國史旺扎勒之父故光祿大夫中書右丞相宣徽使
錫津稟靈河嶽著象星辰應明良千載之期萃忠孝一
門之慶梯天力競元戎奠鷄首之郊扶日功高奕葉應
龍飛之運惟昔中書之草創歷陳治古之宏規位望冠
于百僚利澤施于四海躬承世祖肇隆中統之丕圖子
侍裕皇復贊元貞之初政方倚具瞻之重宜昭先德之
華維垣進秩于上台列爵仍疏于大國錫號著勲庸之

偉易名申節惠之文殊恩允出于朕心卹典非由于汝
請表南宮雲臺之像既彰異渥于宗臣措天下泰山之
安益助貞勤于上宰尚服休命永播英聲可特贈宣忠
保德佐理功臣太師開府儀同三司中書右丞相追封
秦益國公謚忠獻

丞相和爾果斯贈謚制

閻復

北方間氣寔生命世之材黃門清風益出登瀛之選慨
英靈之已往當卹典之崇頒故光祿大夫中書右丞相

和爾果斯派接元勲慶鍾金德早躡鰲峯之首誕披雲
漢之章開闢賢關為司徒而敷五教更張化瑟位冢宰
以統百官恢揚累世之洪休新美至元之大政掄才如
崔祐甫之廣潔已有張忠定之剛著績熙朝既闡文明
之治疏封列國宜居禮義之鄉可贈保德協謀佐理功
臣太師開府儀同三司追封齊魯國公諡文忠

翰林承旨王磐贈官制

王之綱

崇德報功恩靡忘于先正易名節惠體具載于彝章故

翰林學士承旨資德大夫知制誥兼修國史領集賢院

事致仕王磐志大以剛識明而遠惟根本培植于內者

確乎不拔故英粹發越于外者煥乎有文出處無愧于

心窮達不易其守潛知逆黨星言發青社之謀明斥權

姦露奏重紫微之柄出于藩則用蘇民氣入視草則允

契宸衷贊大議于廟堂播清芬于簡策諫止東伐奮不

顧身請復外臺凜然抗疏是以皇祖篤褒嘉之眷昭考

垂飫賜之勤正有待于乞言何屢陳于謝事榮歸梓里

庶衍椿齡朕方嗣服于丕基天不憖遺于一老追惟往
行惕用興懷俾超進于孤卿仍具頒于寵數於戲千古
淵源之學茂以踰修一生忠義之心諒無愧軾顧二賢
已膺于美諡而兩字宜婉于前休精爽如存欽承不昧
可贈榮祿大夫少保諡文忠公

左丞許衡贈官制

姚燧

天非繼聖學之墜緒則不生命世之大才國欲與王道
以比隆肆用為烝民之多覺何物故之已久尚人思之

未忘故資善大夫中書左丞集賢大學士兼國子祭酒
教領太史院事許衡玉裕而金相準平而繩直出處則
惟義所在言動必以禮自持休休焉有容屬屬乎其敬
人能弘道惟朝聞夕死之是期我欲至仁匪晝誦夜思
而不得行已似秋霜烈日化人如時雨和風來席下之
樞衣滿戶外之列履達簡在帝心者率多承弼窮困守
師說者不失善良鶴鳴九臯而聲聞于高鳳翔千仞必
德輝乃下爰立相以堯君舜民之志所告上皆伊訓說

命之言丹宸斥姦少不避雷霆之震擊青臺治厯本于
筭日月而送迎繇理窮而智益明隨任使而職斯舉今
既亡矣誰其嗣之於戲在爾身有垂沒世之名于朕心
有失同時之恨雖成廟納書以命諡固已振木鐸之高
風而功臣胙土則未加用申錫彝章于下地光靈如在
寵數其承可贈正學垂憲佐運功臣太傅開府儀同三
司追封魏國公仍諡文正

元帥烏葉爾封諡制

姚燧

惟太祖之基命龍遂乘雲有良臣以樹勲魚猶得水展
我同姓豈伊異人故金紫光祿大夫北京等路兵馬都
元帥烏葉爾氣鍾光嶽之純全誠貫金石之堅確智足
謀國勇則冠軍佐天運之維新憤人心之未定既降復
叛必煩以行故自北而徂南首遼尾魏亦攘左而塞右
膺齊背秦語其跋履于四方數豈戎衣之百襲為庸已
懋其報宜豐可當非劉氏之不王姑啟若魯侯之大宇
併申褒典少慰英靈噫佳城之鬱年三千名固已昭乎

白日分國于肇州十二澤期不斬于黃河可贈某官追封營國公諡忠勇

元帥耨埒贈諡制

姚燧

朕聞率土之臣莫如同姓干城之將尤可異恩故遠稽于禮經用厚加乎愍冊具官某其在弱冠嘗為選鋒迅與鷹揚號為萬人之敵虢如虎視隱然千里之威屬鉅寇之及郊之總戎之制閭求可居此孰有異然其為人
心所歸不待君命之至推使秉鉞辭拒循牆即下令于

轅門已折衝于尊俎握機旗建四川之草木知名開壁
鼓行三峽之星河動影勇頗牧之非匹策孫吳之可方
入阨危則膺衆所不先分賜與則如士之最下勁騎所
蹙堅城每摧如斯宣力于兩朝何止出奇于百戰嗚呼
降年弗永為烈則多雖狀不及識之亦心未嘗忘者置
戶以守何樵牧可侵馬鬣之墟故壘即封或魂魄猶思
蠶叢之國可贈某官追封蜀國公諡忠武

丞相阿勒坦台封諡制

姚燧

臣為委質勞于同軌之間國以念功恩及綖衣之後雖
飾終其時有所未及在追恤今日烏可或遺爰寵幽褒
用昭異數故光祿大夫江西等處行中書省左丞相阿
勒坦台力齊嶽負量與川涵託開國將種之苞根挺明堂
工師之大木受任閩外賈勇籌邊為憲宗入蜀之前鋒
因殘百粵非世祖投江以尺箠不返三苗報效之私寤
寐不置百其身以奚恤一廼心之是期會師征險順而
貞得夬剛決柔之兆考版圖之幅裂秉旄鉞以鼓行將

削尊號于偏方必使義聲以先路勢來破竹名正包茅
有不待陣風蛇之蟠而已飛塵星驛之捷如震如怒衽
金革北方之強于理于疆盡江漢南國之紀羣黎壺漿
而崩角幼主席藁以泥頭瘁事匪伊成功能爾凡十年
為丞于行省奄一旦違世于先朝白雲杳歸于青山清
風空遺于黃閣像未麟臺之貌服先龍袞之升既進師
垣又建王國俾大書于神路過者式焉示絕等于臣隣
忠斯勸矣尚膺茂渥少慰營魂可贈推忠翊運宣力功

臣開府儀同三司太師上柱國追封順昌郡王諡武敏
妻札拉爾氏封王夫人制

姚燧

大帝立極之十五年嘗曰昔我太祖戡定中夏日不暇
給由天未厭宋德故帝制偏方命將出師一家天下今
惟其時曾不三年墟其廟社雖曰睿筭萬舉萬全亦大
臣奉辭宣力死職忘身有以致茲厥功茂哉用是追崇
故光祿大夫江西等處行中書省左丞相阿勒坦台為推
忠翊運宣力功臣開府儀同三司太師上柱國順昌郡

武敏王其故妻札拉爾氏在父母家幽閑而禮其移天也淑慎有聞所可盡傷在不壽考以語婉德不及見夫丞相建希世之功以語娠賢不得食子大夫糾官邪之祿非責玄壤曷慰貞魂可封順昌郡王夫人

丞相達哩岱追贈淇陽王制

姚燧

出入帷幄在人十能而已則千許謀廟堂為相一年而疾居半竟邦家之殄瘁宜王禮以追崇故開府儀同三司中書右丞相監修國史太保太子太師知樞密院徽

政使中政使宣徽使左都威衛指揮使達哩岱維昔開
國之遺苗乃今太師之元嗣由爾世胄為我親臣事世祖
至今也凡三朝職食官而久者非一日灼其廉明而忠
亮與夫恭遜而溫文眷茲中書出庶政之原居以右相
絕百僚之席使加中政機總六軍善調護而長官師監
纂修以成國史如此重責皆所裕為一德可以寬鄙夫
片言奚止簡繁務思過榮之可懼視倖利以不貪同縮
銀艾者十人爾先辭免其太尉均受錫田以萬畝爾獨

還致于司空觀父子之並相一門求聖賢與尚友千古
改為改作緇衣何賴乎武桓拜後拜前赤舄未慙于周
魯方歌功于清廟倏委魄于玄閭豈意少者沒而老者
存益信神難明而理難測憐乃公獨傷于漠北誓爾後
均胙乎淇陽嗚呼何但上下床在餘子可束之高閣如
失左右手慨正人不作于下泉咨爾靈明歆朕休命可
特贈封諡為懷忠昭德佐治功臣開府儀同三司太師
上柱國淇陽惠穆王

妻緯斯滿公主封王夫人制

姚燧

朕自踐阼于今三年洪惟天地祖宗之佑陰陽和平星緯咸若民物豐阜邊鄙不驚朕是用大賚于羣工凡嘗執政柄理者必追錫及于三世而伉儷之賢亦與嘉褒於戲是曠代之典也具官達哩岱妻某毓秀朱邱作配相門少習儀訓閑于婦道貞順著稱垂範閭閻相厥夫子為世英宰而芳蘭早萎不終榮顯懿彼宗戚失此女師開吉壤于淇陽正邦家之顯位服我新寵安爾幽靈

耶律自贈官制

姚燧

臣克厥艱而始民敏其德子焉能仕皆由父教之忠眷
予問義之人師實漢僕射之位長固求還笏難斷抗章
是用追崇莫先庶以垂裕乃後昭文館大學士中奉大
夫國子祭酒耶律有尚之考提領東平路工匠所長官
鈞中書猶子丞相從兄宗承遼室之遺苗禰死金源而
全節尚論其世孰踰爾家而又誨嗣續善詩禮之敦于
以見平生憂紃袴之習自夫共工之謝晏然同俗之安

爭饋肆乎五漿振衣岡于千仞奉先惟孝雖耆耄于禴祠也親焉接下以恭其臧獲之久故者民耳匪直入官而知止抑展在家而必聞惜棄世于九齡負為國之三老於戲神遊安往定徘徊乎故鄉袞寵即封用昭章于凝墓嘉誄以副殊渥罔遺可特贈昭文館大學士資德大夫追封天水郡公諡莊慎

高麗國王封曾祖父母父母制

姚燧

昔我太祖皇帝之奮舉漠北也東旌西旆分甸南服昭

德示威所向臣妾惟時三韓境壤相聯天戈一臨開府
儀同三司太子太師上柱國駙馬都尉瀋陽王征東行
尚書省右丞相高麗國王王璋之曾祖故高麗國王王
暉深察機運舉國內嚮事會之來間不容髮自非秉志
端慤明識遠慮疇克如是哉又屬遼民餘孽潛竊島嶼
狂肆弄兵陸梁假息重煩命將致討于時冰雪沍寒饋
餉不通而暉乃能供侍轉輸師皆宿飽軍興器仗資助
無闕復濟師徒往殄殘寇其于肇造開基立勲王室保

民興邦莫之與比故得守土享年殆將四紀澤及後昆
流慶斯永傳子若孫與國連戚不其韙歟是宜追崇上
爵仍易嘉名魂而有知歆茲異數可贈敦信明義保節
貞亮濟美翊順功臣太師開府儀同三司尚書右丞相
上柱國高麗國王諡忠憲

崇德報功法舉追榮之典分邦列爵恩頒及內之章酬
我舊勲同茲顯號具官高麗國王王璋曾祖母柳氏傳
芳令族作配高門屬皇祚之興隆偕名藩而臣附明賢

所化貞信無頗傳子至孫極富與貴三韓保國位同異
姓之侯王五等疏封名亞寡君之宗室聿新殊渥庸慰
淑靈可追封高麗王妃

朕觀今天下有民社而王者惟是三韓及祖宗而臣之
殆將百載厥父菑而子復肯播曰我舅則吾謂之甥既
勲以親宜貴與富禮克先于事大典可後于追崇具官
高麗國王王璋之考純誠守正推忠宣力定遠保節功
臣太尉開府儀同三司征東行中書省右丞相上柱國

駙馬高麗國王王昺移孝為忠易威以惠禮樂刑政之
修者典章文物皆粲然惟大猷之是經與小心之以翼
初由世子已帝女之降釐旋俾嗣王非公孫之復始遂罷
時貢其方物願同歲賜于宗親責秉鈞以東征期奠枕
于南面追叛王挺身于遼水出選兵壓卵以泰山戰踵
未旋逆首以授雖居位未周于三紀而享年實過乎七
旬中壽共言今代希有矧其子式穀之是似則斯人沒
世為不忘自官階而進之至師垣而極矣夫既封玄菟之

墓表滄渤以為襟何必刑白馬以盟誓黃河之如帶尚
期貞魄庸服恤章可贈純誠守正推忠宣力定遠保節
寅亮弘化奉慶功臣太師開府儀同三司尚書右丞相
上柱國駙馬高麗國王諡忠烈

三韓為國五季已王雖居東溟之濱實享南面之樂由
其先有功于太祖許帝室以連姻故李女鍾愛于世皇
即公宮而命黜方穰青軒之桃李俄淒白露于蒹葭眷
懷懿親用隆恤典具官高麗國王王璋之妣皇姑安平

公主高麗王妃發祥坤掖分派天潢以舜妃癸巳之宵
明為古公亶父之姜女善于婉德車服不矜其夫家樂
有娠賢茅土已纘其父服可謂全妻道之終始苟不因
湯沐之安平原進大封曷彰尊屬於戲自他邦之道里距
北闕以五千移近甸之河山盡東秦而十二明靈可作
殊報是膺可追封皇姑齊國大長公主高麗王妃

元文類卷十一

欽定四庫全書薈要卷二萬九十五

元文類卷十二

元 蘇天爵 編

制

高麗國王封贈祖父母制

洪惟我祖天錫勇智正萬邦迺眷爾家世篤忠貞有成
績益本深而末茂具德厚者流光開府儀同三司太子
太師上柱國駙馬都尉瀋陽王征東行尚書省右丞相

高麗國王王璋之祖故高麗王王植祇訓向方飭躬迪
吉佩服儒雅奮勵材猷初父命之親承以土宜而入貢
會桓肅西巡于川徼而世皇南撫于江壖亟期行李之
通寧恤歲華之易途屯以永內訌仍邁于家艱號渙其
申還納旋膺于晝接中統之風雲載啟三韓之疆宇重
臨從容必中于事機造次弗忘于禮憲首遣明廷之質
有來冢嗣之良釐降展親示渥特殊于他姓服勤尊主
輸誠益拱于中天不諛是征屢為先導奉朝斯謹罔失

常期孫繼尚于皇姬國允資于碩輔有為有守昔戡
濟之功多言盛言恭茲弼諧之望著盍旌舊哲庸責
嘉稱太師維垣爵以馭其貴君子如社制以象其賢
庶幾往訓之遵亦曰徽彛之舉於戲匪報也永為好
也思隨鸞檢以疊章惟有之是以似之系與鴨江
而並遠可贈端誠奉化保慶亮節康濟佐理功臣太師
開府儀同三司尚書右丞相上柱國高麗國王諡忠敬
昭令德于前人爵已隆于三世受介福于王母恩特侈

于再傳具官高麗國王王璋祖母金氏淑慎其儀柔嘉
維則東藩作儷北闕聯姻不墜簪圭功有武公之父子
親承盥饋禮如王氏之舅姑一則彰夙夜之勤一則示
閨門之肅嗣為貴壻况有賢孫諄襲請䟽之來聞赫奕
徽彛之並舉鳳締鸞檢翟第魚軒於戲重莫重于傳家
有懿含飴之訓榮莫榮于錫號往歆加祿之章可追封
高麗王妃

趙與芮降封平原郡公制

王構

我國家法天立統稽古象賢武定方維暨聲猷之益廣
思加降附宜寵數之兼隆廼矚耆英其敷制冊趙與芮
身端而行治識遠而量夷曩在南邦屬為近戚儼若典
型之舊歸然位望之尊阻隣好以弗修知天心之厭楚
棄官榮而高蹈偉王子之去殷幾年退處于鄉閭庶事
靡聞于朝著執吾信使惟彼權姦爰興問罪之師用慰
侯蘇之望江右之連城不守始奉表以請降浙東之遺
老雖存亦挈族而來覲然制有上下等威之別而情無

親疎遠近之殊分土惟三爵已崇于而主降級以兩名
未正于爾躬是用晉以大階賁之華綬天秩亞上公之
貴月卿躋太府之班於戲辨宗伯之九儀王者所以示
綏懷之禮兼洪範之五福人臣所以全安養之榮茂對
寵光往堅素履可授金紫光祿大夫檢校大司農平原
郡公

丞相阿爾哈雅贈諡制

王 構

朕惟不世之賢膺不世之遇非常之人立非常之功方

一統之宏開有六師之分董鄂漢順流而下勢甚建瓴
荆湖堅壁者多事猶掣肘儻弗資其雄畧其何奠于遐
方故光祿大夫湖廣行中書省左丞相阿爾哈雅端慤
而疏通聰明而果銳禁廷久侍簡眷良深朝政參知弼
諧有賴遭明時建長策機決于十年之先殄餘孽芟羣
凶威行于萬里之外下江陵以為之根本破長沙以潰
其腹心外梗咸除率虎旅平吞于桂海降旌隨暨故龍
驤直抵于錢塘猗惟黻袞之加煥若雲章之諭錫賚榮

多于貴近勞還位亞于侯王忠于國惠于民靡不用其
至也報爾功崇爾德孰能與于此哉雖當年左揆之特
升顧今日彛章之未舉佇遂圖形之制彌深撫髀之思
爵首冠于臺司封乃疏于舊國曰武以旌其戰伐曰定
以著其和平名則易之期百千世禮之同者惟一二臣
於戲周宋為鐔石城為鐔朕仰繼皇王之大武黃河如
帶泰山如礪卿允為宗社之元勲尚冀英靈永言歆格
可特贈佐平南紀宣力功臣開府儀同三司太師上柱

國追封楚國公謚武定

丞相達爾罕贈謚制

王構

予欲宣力四方所賴人才之叶助天不憖遺一老其何
治化之成能故中書右丞相哈喇哈遜達爾罕嶽瀆英
靈乾坤間氣執德弘而信道篤裊身正而格物深判宗
寺兼示恩威奠藩封于磐石之固坐朝堂不動聲色措
天下于泰山之安位不以內外為重輕事不以險夷為
去就擴神明之蘊有室皆通推惻隱之心靡寬不釋惟獎

善疾邪之太甚故積憂成恙以相仍言仁義如魏文貞
寧恤儉徒之巧沮佩安危若韓忠獻詎容神器之他攘
刃游于批大郤之餘器別于遇盤根之際離網未綴一
誠堅抗羣囂泰運重開百慮竟如素策顧嗣基之伊始
其佐命者惟卿載績武功上膺邊瑣駟介不煩于屢駕
袞衣佇俟于來歸云胡馳訃之聞遽爾輟朝之慟雖卿
之所守匪生而存匪死而亡然政有或疑奚究而問奚
取而決詢之輿議揆以舊章真王超異姓之封顯秩冠

上公之貴治典教典並以褒崇東平廣平罔俾專美鳴
呼國家之講制度一二臣式克似之天理之在人心百
千世不能易也永言孚格以啓方來可贈推誠履正佐
運功臣太師開府儀同三司上柱國追封順德王謚忠
獻

平章史弼封鄂國公制

王構

嗣德罔不在初粵彞章之具舉舊人不克遠省疇偉績
之特書榮祿大夫平章政事議樞密院事提調諸衛屯

田事史弼器博而用周志剛而行敏早繇禁禦出揔戎
行英明兼本乎天資方畧悉合于古法視長江如履平
地居然獲跳盪之功撫疲黎猶保稚嬰允矣著綏懷之
效始自淮襄之百戰迄于嶺海之同風顧宣力之獨多
其推誠則弗替終始三朝之眷賜環屢壓于宸班優游
六藝之文緩帶雅稱于儒將是宜賁之華綬衍以真封
以酬既往之勞以示惟新之渥於戲功臣圖象秩盍冠
于褒公元老壯猷忠尚資于方叔益圖報稱祇服訓言

可特加銀青榮祿大夫封鄂國公

翰林承旨姚樞贈謚制

王構

昔有先正蚤事聖皇惟夙夜單厥心而終始典于學如
伯益之贊夏禹暨尹躬之佐成湯行乎仁義之途任其
社稷之重計于廟堂之上明夫事幾之先益精神志意
之相孚故啟沃都兪之靡間制難拘于一例恩特侈于
屢書故翰林學士承旨中奉大夫詳定禮儀使贈榮祿
大夫少師文獻公姚樞以淵識弘謨為國著蔡以清彞

素檢為時楷儀曉萬事安異同式羣工壹統畧周旋必
禮溫溫維德之恭敷納以言蹇蹇匪躬之故止殺允符
于宸慮宣澤丕應乎天工以故中和且平近者親遠者
附不賞而勸大臣法小臣庶國家之表裏可觀風俗之
樞機隨轉績已成而弗有身愈退而彌尊顧當時耆壽
其誰歟致今日隆平者公也正事正言正道親傳文祖
之燕謀有德有功有能首被先朝之鴻訓肆朕纂承之
始于公簡畀之深槐序延登衣仍袞黼裳陰未徙祚延

龜蒙因諡以正其名崇章以介其祉於戲得天下賢材
斯足矣方圖政化之新有朝廷大議則就之慨想儀刑
之舊徃欽茲命以永其傳可加贈嘉猷程世舊學功臣
太師開府儀同三司追封魯國公仍諡文獻

翰林承旨姚燧父楨贈官制

王 構

朕尊祖敬宗升崇嚴諡推恩錫類字告朝廷鴻文鉅冊
之參修縟典彛儀之詢考叶成熙事允賴耆儒迹先德
之繇來盡惠術之同衍翰林學士承旨榮祿大夫知制

諱兼修國史姚燧父楨名門甲姓偉望通才初與長公
聯芳于西洛繼為膚使持節于南孺以拯濟生靈為心
以拔揚茂異為任爰艱危而靡恤期德澤之丕揚所全
活者幾千人若昔鄧公之河役其徃依者五百室非惟
李氏之義門奚我生之弗辰竟以死而勤事風雨憂時
之畧有鬱于中蓄畬名世之規以貽于後滙之深流之
濬培之厚發之弘嚴潔雄深文獨高于衆作光明正大
學載侈于宗傳况密旨之親承時洪謨之叶贊成吾孝

治緊爾義方既因其親以及人之親故尊所教俾掌邦之教而先兄後弟繼文以忠以章節惠之文以示遺經之報於戲貞風千古歸然不廢魯靈光太史一家嗣者無慙漢司馬永言介止式克歆茲可贈銀青榮祿大夫大司徒追封魯國公諡忠獻

留守段貞贈諡制

王構

蕭司留務漢高旌端本之規垂作共工虞舜廸有邦之訓昔聖皇之在御稽往古以建官惟時亮工朕其疏渥

通奉大夫大都武衛親軍都指揮使司達魯花赤提調

大都屯田事大都留守兼少府監段國幹故父銀青光

祿大夫司徒武衛親軍都指揮使司達魯花赤大都屯

田事提調六都留守司少府監事貞際亨隆之運效乃

所長襲通敏之休善于其職端莊恪慎周密疏通心休

休焉如有容器渾渾兮靡可限卜澗瀝食惟浴議首定

于遷都象天漢揆之功勲屢書于考室應叢機則曲當

奮奇畧以無前審勢度材六司之事異矣攻金刮玉一

器而工聚焉厯華貫凡千七階翼皇基于億萬載慨生
存之莫復宜褒諡之兼崇以衍封腴以疇勤濟於戲紫
微丹闕非徒示壯麗之威鯁論直言無復見典刑之舊
尚其英爽式克欽承可特贈效忠宣力功臣太傅開府
儀同三司上柱國追封安國諡武定

播州楊邦憲贈諡制

王 構

朕惟牂牁重鎮介巴渝之間世其守者曰楊氏自唐涉
宋代不乏人嚮者邦憲審于去就挈版圖內附世祖皇

帝實寵嘉之速朕纂服嗣子漢英率先羣牧述職來庭
以父歿未諡乞褒贈夫爵以馭其貴諡以成其美治國
之道也況先朝屏翰之臣邈在一方而能綏輯其民不
失常業餉兵增戍屢效忠勤如邦憲者不以易名可乎
於戲據德論功惟彛章之具舉有子承考尚奕世之彌
光可贈某官諡敏惠

平章庶希憲贈諡制

元明善

惟我世祖皇帝肇自藩服受鉞專征天賚良弼為之左

右一家四海傳次在予名爵之崇顧斯實新故榮祿大夫
中書平章政事贈清忠粹德功臣太傅開府儀同三司
追封魏國公諡文正庶希憲清忠粹德文武元臣蚤以
門閥之賢入膺寄託之重非詩書不陳于上前非仁義
不行于天下憂國忘家愛民如己西靖秦蜀東極青齊
北清遼碣南鎮荆湖在中書者曾幾何年而能立大法
銷大患進大儒摧大姦耻身弗及伊周耻君未邁堯舜
言昔賢之所難為人臣之不敢疑然三代之佐益將師

表百世者矣天不憖遺哲人先萎雖諸子列官省臺于
朕心猶懷舊德是用進以極官加之上爵於戲表賢能
所以尊朝廷也假名器所以報忠貞也稽若王章得茲
二美凜乎生氣天地猶存服此殊榮尚開爾後可加贈
推忠佐理翊運功臣太師開府儀同三司上柱國恒陽
王仍諡文正

參政商挺贈諡制

元明善

若稽世祖聖神廣運徵聘英賢疆理天下時則有若正

奉大夫中書參知政事商挺以王佐之才濟經世之學
越自侯服召列潛藩迨臨寶祚蔚為謀臣四鎮秦蜀而
銷急變靖大亂武文迭效再入中書樞密而弘帝業固
邦本啓沃深深凡中統名臣率備飾終之典矧爾斷國
十有七謨遺勅在耳朕曷敢私是用製勲號定美諡躋
之極官昨之吉壤於戲道積于躬君子之美利也賞延
于世帝王之大賚也服茲異渥丕顯休命爾後人與有榮耀
焉可贈推誠協謀佐運功臣太師開府儀同三司上柱

國追封魯國公諡文定

樞密趙良弼贈諡制

元明善

昔聖祖歸自武昌啓皇元始于中統天人胥贊宗戚叶
從無何僭逆之餘輒作陸梁之態誰其將指先二使以
遄征事則從權果羣凶之畢殄興言及此軫念久之資
善大夫陝西等處行中書省參知政事趙訓父僉書樞
密院事良弼才周庶務而洞察其幾學貫三才而不滯
于用既輸誠于佐陝亦盡瘁于行東撤蓬戍之藩籬淨

纖氛于雲棧易弁裳而冠帶渺一介于滄溟凡危衝和
照之突來必大義純誠而自處故平生之偉績恒簡在
于宸衷宥密八年險夷一致謙謙素履具見于典型婉
婉良籌每資于匡翼賜第之留未久引年之請彌堅雖
房喬不忘秦府之游而李泌雅志嵩陽之隱在今日孰
堪倚重顧舊臣寧復如卿持示褒崇盍由異渥於戲廸
世以章平之訓有蔚其華疏封于趙魏之才所憑者厚
朕將示勸卿其敬承可特贈推忠翊運功臣太保儀同

三司追封韓國公諡文正

平章董士選贈三代制

元明善

大裘無文可用致饗良玉韞璞孰窺至珍緬懷遺逸之
民邁種渾圓之德克昌厥後不在其身榮祿大夫陝西
等處行中書省平章政事董士選曾祖父昕猷猷恬愉
里閭退讓開田種木深期蔽日之輪困如山出雲莫測
為霖之變化子能擇主孫亦象賢一門萬石之家聲四
世五公之譜牒於戲慎終追遠分茅宣曾矩之光崇德

報功推本叶孫枝之願亶茲異渥寵爾營魂可特贈光祿大夫大司徒追封趙國公諡宣懿

駿命握乾誕啓中天之運豹韜宣武叶成上國之光想風雲之會匪常慨日月之流如駛爰加顯號以慰故臣董士選祖父贈翊運効節功臣太傅開府儀同三司上柱國追封壽國公諡忠烈俊被褐潛珍棄書學劒戎馬折衝之未勲志已出塵雲龍胥會之有開身先就日獨立中山于艷晚之際兩復真定于敘攘之間釋兵為農

所活者衆延師教子其訓益深馬革裹尸實可憫生前
之語虎頭食肉終有期沒後之榮德之厚者嗣必昌功
之著者禮必報肆朕嗣服念爾疇庸斯廣重封式彰異
數於戲修祖廟陳宗器在予君臣之交乎光王室廸天
休惟爾子孫之無斁精爽不昧寵渥其承可加贈推忠
效節翊運功臣依前開府儀同三司上柱國改封趙國
公仍諡忠烈

君臣相資莫喻同心之美忠孝兩立斯為佐命之殊謂

竹帛曷能以既其勲絕坐席猶足以優其禮惟祖有訓
非朕敢私具官董士選父資德大夫中書左丞僉書樞
密院事贈金紫光祿大夫平章政事諡忠獻文炳正大
剛方明允篤實起家試邑棄官羞墨綬之卑杖策從軍
絕食望翠華之遠刑輕典以安反側釋降人以靖流離
白日揮戈埤堦益張其羽翼長風破浪蒙衝直擣其腹
心政在養民市不易肆辟國可方于姬奭活人何減于
曹彬嶺嵒宣威南人不復反矣塞庭請討周公方且膺

之恂恂持儒者之風諤諤挺大臣之節靖念丕圖之建
采深喬木之思格于皇天雖儼若帝庭之陟降渙其大
號必有加玄宅之褒崇錫以嘉名胙之列國掌武襲建
牙之舊開司增立戟之榮九原如生終古永譽於戲英
才間出足為邦家之立基盛德無瑕宜爾子孫之逢吉
載頒明制尚慰靈魂可加贈宣忠開濟佐運功臣太尉
開府儀同三司上國柱追封趙國公仍諡忠獻

中丞于璋贈諡制

元明善

善人天地之紀德莫有加君子邦家之基歿猶不朽
懷遺直追錫殊封故資德大夫江南諸道行御史臺中
丞于璋志蘊忠貞運逢熙洽慶雲甘露氣和而動植自
宜威鳳祥麟瑞應而猛鷲咸伏結深知于世祖參大政
于武皇澄清每振于憲綱動靜允維于國體逮朕嗣服
召卿來廷賜以繡衣執法應仲端之象專茲白簡行軺
寬南顧之憂遽何馳訃之聞益有崇褒之渥於戲劉寬
長厚允宜居鼎鼐之司胡廣中庸謂當久臺閣之任事

幸往古恩慰九原咨爾營魂服我休命可贈推誠肅政
功臣光祿大夫平章政事柱國追封薊國公諡文簡

中丞崔彧贈諡制

張士觀

獻可替否治獲佐于明時崇德報功禮宜加于卹典故
榮祿大夫平章政事御史中丞領侍儀司事崔彧山川
間氣簪紱名家俾司綿絕之儀繼彼瀛洲之選靡繇一
介之助自結九重之知遂擢置于秋卿俄紀綱于柏寺
奏請宮嬪之議罷征日本之師章疏可方之古人措紳

無出其右者擅生殺之柄忍容義甫之姦抑聚歛之臣
力止延齡之相兩過文昌之府嘗僉宥密之司于琴瑟
更張之初贊七鬯主器之決屬元貞方大有為之日適
先帝重中執法之官視左右何以易趙克在朝廷何可
無汲黯薦耆儒而備顧問崇名教以渙絲綸活人命于
頃刻之間回天威于雷霆之下以去留繫憲臺之輕重
辨邪正公天下之是非凡可以尊主而庇民曾不避犯
顏而直諫慨話言之尚在想風采之如存永孚于休以

昌歆後可贈推誠復正功臣太保開府儀同三司追封
鄭國公諡忠肅

平章李庭贈諡制

張士觀

混一之期有開于真主恢攘之寄充賴于忠臣其器博
則用廼周其才全則效斯著顧奏捷獨多于羣帥而疇
庸豈限于勲章故榮祿大夫平章政事議樞密院事提
調諸衛屯田事兼後衛親軍都指揮使李庭宣力襄樊
振威嶺海甫師干之歷試俄斧鉞之升崇劍敵萬人縱

橫制變衝當一面出入如神納之牛腹而獲生載賈登
俾之勇蔽以馬羈而捷驚疇爭執訊之能其韜鈴動合
于昔賢故聲烈特聞于今日至于危聖祖東降僭孽所
向無前翼先朝西奠遐陬其猶克壯決策無遺者審幾
之先見而幾則灼然緬懷熊豹之資忍聽鼓鼙之奏生
也加封之弗逮名焉節惠以為宜於戲黼冕桓圭昭其
文昭其度王符麟節傳之子傳之孫精爽如存寵光無
數可特贈推忠翊衛功臣儀同三司大保上柱國追封

益國公諡武毅

丞相布琳濟達封河南王制

程鉅夫

撫帝業之艱難爰思將帥啓功臣之盟誓宜及子孫咨爾在廷聽予作誥開府儀同三司河南江北等處行中書省左丞相布琳濟達智明識遠心廣氣和勲名克篤于前人藩翰久勤于外服昔將平于內難朕大投艱方深計于中途卿獨決進志存弼亮身佩安危所謂社稷之臣盡享尊榮之報乃復煩于機務非示寵于忠良是

用命汝襲諸侯王以長守于富貴歸丞相印以自養于
壽齡既不遠于京師可以時而朝覲允資重望坐鎮一
方於戲表河之南念茲乃祖乃父為國之屏敬哉有土
有民永建厥家毋棄朕命

高麗國王眭加恩制

張士觀

咨爾高麗國王王眭秉心直諒賦質貞純早克嗣于先
猷久服勞于王室身惟國壻寅居賓日之方男即皇甥
復預乘龍之選築館荷兩朝之眷分茅襲百祀之傳肆

陞右揆之階光應上台之象茲薦頌于寵數其益勵于
忠勤動惟一德之懷居必正人是與祖宗世稱漢藩輔
保樂土于三韓父子並為周司徒播清風于萬古可特
加純誠守正推忠宣力定遠保節功臣開府儀同三司
太尉征東行中書省右丞相上柱國高麗國王尚服渥
命以介福祺

安南國王陳益稷加恩制

程鉅夫

委質歸朝既去逆而效順以爵馭貴宜崇德而報功誕

播明綸用孚衆聽銀青榮祿大夫安南國王遙授湖廣

等處行中書省平章政事陳益稷知畏天者事天期保

境以安境慕帝王之有真見幾而作懼祖宗之不祀自

拔而來以忠孝之誠而受知于世皇蒙天地之德而賜

封於故國始者周王之赫怒伐罪弔民終焉舜帝之誕敷

班師振旅彼迷不復爾守彌堅拯溺救焚從王師凡一

再舉適館受餐留湖右幾三十年身厯事于四朝志不

渝于初節肆朕即祚亟其來庭是用加新秩以示恩仍

舊封而授職於戲內寧外撫朕不忘銅柱之南近悅遠
來爾益拱辰星之北對揚休命永堅一心可加金紫光
祿大夫安南國王依前遙授湖廣等處行中書省平章
政事

平章張珪封蔡國公制

吳 徵

天地之間有正人國家恃以為元氣卿之忠藎朕所眷
知比因疾以祈閑爰加恩而優老榮祿大夫中書平章
政事張珪彞常世閎廊廟宗工早摠戎旃已作禮樂詩

書之帥晚司化軸遂稱文學政事之臣左右六朝出入
三府險夷不易其守鯁亮以如其初太清罹薄食之昏
前期致沐浴之請越于新服嘉乃舊勲諤諤之節詎肯
詭隨侃侃而言類多裨益黷雖謁告爽尚勉留俾辭鞅掌
之勞專罄格心之學緬惟先正嘗平金壘以立功宜得
後昆復就蔡封而襲爵所謂故國庸建上公思竭爾忱
廣敷陳于經幄欽承時命永翊贊于皇猷可封蔡國公
提調經筵事

許衡妻敬氏封魏國夫人制

鄧文原

魯國有真儒實弘宣于道統周南得淑女必肇正于人
倫肆予社稷之臣夙有閨門之化爰旌令則特示崇褒
具官許衡妻敬氏性靜以貞行恭而順自職居主饋孝
克奉于旨甘逮貴被展衣儉猶親于澣濯惟我宗工盡
贊襄之道由爾內助秉柔正之儀雖善慶之報方來而
哀榮之典未稱庸視茅封而進秩式頒芝檢以疏恩於
戲夫婦相敬如賓亦既追榮于偕老公侯必復其始尚

其啓迪于後人

丞相拜珠贈諡制

袁 桷

八柱承天棟橈萌于巨構六龍御日輻說鼎于中街愍
死難以成仁攷生榮而錫命故中書右丞相拜珠鼎彝
王社闕閱相門自結主知應雲龍之異遇獨持國是炳
著蔡之先幾陳于上者不足言見于事者為可則斥聚
歛之臣以靖四表誅黷貨之徒以正庶官庫無餘財拔
葵之訓靡替門絕私謁懸衡之鑒益公天下望其治平

朝廷以之模楷然盡言招過儉謀愈深選賢與能奸黨
滋懼變成肘腋禍起股肱山嶽動搖日月昏蔽雖元兇
正罰足明朕心在貞惠易名姑慰卿意分茅故壤增爵
維垣噫未明入朝竟墮承宗之計盛服假寐孰為鉏耨
之賢念此盡傷恩斯優渥可贈清忠一德佐運功臣太
師開府儀同三司上柱國追封東平王諡忠獻

平章布呼密贈諡制

盧亘

朕凝命穆清式觀天造將啓靖邦之嘉運必生名世之

大賢挺出類拔萃之資行尊主庇民之學使之君臣同
德夙夜盡心協贊璣衡融景化于瞬息之頃深謀廊廟
致太平于期月之間禮樂以之而興隆陰陽由之而順
序昔聞其語今見其人故昭文館大學士榮祿大夫平
章軍國重事行御史中丞布呼密明允篤誠溫文廉讓
研精聖道得先儒淵秘之傳藻勵忠規承世皇簡注之
渥薦膺器使徧厯清華殫物洽聞而守以正經德廸慮
而不近名屬熙朝更化之初開明堂垂拱而治升居台

鉉俾罄訐謨一澄苛弊之源大洗姦諛之迹事至立斷
言為天下之公知無不為才實王者之佐攬羣材而並
進理萬變而不疑弘沃聖衷誕孚辰告翊先帝履尊之
際輟元臣分陝之行再入秉鈞遽聞辭疾彌綸軍國閔
勞機務之煩提挈憲綱坐見朝廷之肅儵號隆福之僊
馭旋驚梁壞而山摧寧不百年遂亡一鑑備觀規摹之
盛可謂社稷之臣肆予撫軍言還懷茲懿德當宁而嘆
恨不同時圖高密于雲臺丹青罔既詠裴度于丘禱柱

石徒衰是用寵以帝傳之崇賜以周公之履庸起具臣
之勸允為儒者之光繫爾英靈歆茲明命可特贈純誠
佐理功臣開府儀同三司太傳上柱國追封魯國公諡
文貞

思州田鴻和爾巴哈封二代制 馬祖常

國家外建藩屏以靖遠人責其宣布懷柔之惠能使恩
威並流而一方清謐者稽于國典可不賞勞乎具官某
父某官某尚膺朝寵勤庸服官戮力小心不聞有過乃

教忠于嗣息得襲慶于世家茲朕所不忘者也故命追
褒異數階秩一品有靈在幽尚迪爾後

比屬有司考禮于卹典矣而婦人之貴嘗視其夫子焉
况有鵲巢汝墳之懿能行于其閨門衽席之間者乎具
官某母某氏女儀柔婉來嬪辨族相其宗事珩璜有節
又能篤生令子服于疆場撫綏之勞湯沐衍封昨以列
國其尚歆承休寵利爾後昆以延饋祀之無已哉
朕以孝治天下凡人臣之親悉命因其班列之次功庸

之等以為寵數之異焉具官祖父某官某昔脩官使輯
綏邊氓頗著惠懷有誓南服夫天之施仁于物無間朕
敢不法天意哉宥密之司階品為貴啓爾後人保茲終
吉

先王制禮婦人之義飲食衣服祭祀而已非有與于外
事也然或婦道母德可以表率宗族而成其夫子者顧
宜有以顯賁之也具官祖母某氏早躬組紉克遵女戒
作配令族柔閑有儀惟時聞孫扞我邊圉膺被爵祿光

寵于時而爾可不素封鄉國以廣彤管之訓乎贊書在門其告泉壤

太史令王恂贈諡制

王士熙

洪惟世祖致治三代之隆總攬羣英得人一時之盛碩儒既往卹制宜加故嘉議大夫太史令王恂雅德端方醇資淵懿學邃天人之祕運親神聖之遊嘉謀嘉猷有則入告于后先知先覺又將下被于民參儲闡調護之勤聞政府機密之奏望重漢廷之園綺職專堯典之羲

和改厯授時日月星辰之順軌崇術造士詩書禮樂以
移風太平立邦家之基正直折姦邪之氣朕承景命爾
不同朝比觀嗣子之陳采切思賢之感章披雲漢識裕
皇舊學之初誓指山河啟昭代新封于後華躋公袞世
易佳名於戲元氣所憑不存亡于生死九原可作尚哀
榮于始終罔昧其承以昌厥續可贈推誠守正功臣光
祿大夫司徒上柱國追封定國公諡文肅

御史觀音寶贈諡制

李端

見危授命乃臣子之至忠崇德報功寔國家之令典表
茲竒節沛以新恩故監察御史觀音寶以才大夫為真
御史蚤給事于宿衛每供職于諫言殫輸向日之誠益
勵飛霜之烈實封奏疏欲竭力以回天密邇姦人竟交
讒而蠹國互激雷霆之怒誤罹斧鉞之誅凜雖死以猶
生諒無善之不報於戲紫垣垂象正執法于星辰青簡
流芳永爭光于日月尚期貞魄服我寵章可贈資德大
夫御史中丞上護軍追封漁陽郡公諡貞愍

丞相巴延祖考封諡制

宋本

元宰立功懋贊千年之運大廷敷號肇開奕世之封滙
流窮源積善必慶故中書右丞相巴延祖考故千夫長
阿喇沉毅而窮力忠勤而小心從役呼展奮蛇矛而深
入虜征蜀道裹馬革以長終賢勞宿著于生平陰騭益
隆于身後天開神聖闢中土而大同地隔江淮獨東南
之未下廼生孫子一我寰區肆加命數之隆用極褒崇
之典位既登于師傳秩並進于階勲胙土分茅易名節

惠于以舉公朝之憲度于以嚴私室之烝嘗於戲王父
抱孫事業誕敷于閎閱天子建德恩光永賁于幽潛尚
其有靈服之無數可贈推誠佐理翊運功臣太傅開府
儀同三司上柱國追封淮安王諡武康

御史大夫僧格實喇封諡制

謝端

列爵之等以馭貴孰加于諸侯王元勲之胄而象賢宜
膺于三錫命云胡殄瘁之蚤重予盡傷之懷故榮祿大
夫江南諸道行御史臺御史大夫僧格實喇鍾純美


之資負經綸之畧粵若乃祖相我世皇始成混一之功
未受顧託之命襲其善慶惟時聞孫不階父師之訓而
忠孝夙成篤于君臣之誼而夷險一致居給舍則伏蒲
而抗論司宥密則彊本以折衝河汴交流分廟堂之重
寄東南都會長端憲之崇班皆能綏輯士民肅清綱紀
甘棠之愛遺澤猶新喬木之家清風未慙夫既世濟厥
美而不天假之年繫淮陽之故圻爾先世之胙土廼啟
封而陞秩仍節行而易名具之贊書賁于幽壤於戲霖

雨舟楫之用雖不究于當時河山帶礪之盟尚益昌于
爾後英爽未遠服茲寵靈可

闕



元文類卷十二



總校官候補中允臣王燕緒

校對官編修臣許兆椿

謄錄監生臣應先烈